

# 肥鄉縣志卷十五

兵紀

齊登勇爵士不讓而爭鳴秦尙首功民不親而樂戰所以春夏詩書秋冬禮樂儒者不談兵載囊弓矢載戢干戈將軍不好武然而時平則敦詩說禮世亂則偕作同仇弭兵非所以爲名有備惟期於無患肥鄉爲冀南一隅之地無險可憑當山東一面之衝有兵先被狼奔豕突鋒方銳而難當烏合鳴張火連村而不斷幸賢令算無遺策共濟和衷許難民實至如歸完守入保開關延敵衝鋒解三匝之圍拔幟先登制勝排五花之陣驅市人而使戰制挺撻堅甲利兵合衆志以成城使民可知方有勇修孝弟忠信庠序內竭節全貞嘗險阻艱難帷幄中運籌決策巔末悉載因人成事我非自以爲功勝敗無常移步換形人莫輕於嘗試志兵紀

征剿胡盧營紀略

咸豐十一年二月山東延安營教匪從士欽等倡亂濮州捻匪劉占考應之連陷莘縣冠縣館陶邱縣觀城朝城范縣濮州肥鄉聞警楊樹屏劉光陞設立練局延請紳董採買火藥打造軍器操演團丁以資防守遣史紹勳赴山東邊界嚴密偵探三月渡運河陷元城之小灘鎮並清河縣二十日進陷曲周人情大

## 肥鄉縣志

卷十五 兵紀

一

震縣幕辭館典史張慶平告病張廷昭請假數日聞信奔還練局派勇分門把守楊竹坡守北門張夢星守西門李占魁守南門前任外委袁守東門以靖人心四月十三日山東教匪紅旗頭目蘇崐岡率賊數千會合廣平曲周教匪土匪至縣境胡盧營村中逆首王大忠與之合蓋蘇崐岡王大忠皆延安營從士欽弟子也互相勾結逆焰愈張是日進陷廣平人心惶惑東路村民不逞之徒多與賊通訛言四起城中遷徙一空始將四門封閉僅留南門以通出入李占魁舉家人城張廷昭家中召之還不顧也十七日王蔭堂觀察遣兵二百餘赴大名路過肥鄉樹屏欲留與進剿帶兵官不從樹屏臥轍攀轅以留之亦不從人情愈懼十八日探得胡盧營山東賊已北回本地賊匪無多可破也十九日整齊練勇知會鄉團於次日進剿二十日樹屏光陞竹坡帶城勇三百人出隊張夢星李占魁從張廷昭王琴堂孫好仁梁錦堂會同四關紳民守城遣董德麟赴元城之王村約會大名聯道憲之兵兩路夾攻鄉團聞信從者甚衆至東賢店整隊少息而董德麟至言道憲之兵婁鳳閣所帶薛思諒等不伏調遣不肯會兵樹屏曰事至此能已乎指揮大衆分兩路取胡盧營樹屏光陞竹坡帶練勇鄉團從南路進作正兵前任外委袁張夢星李占魁帶練勇鄉團從北路進作奇兵距胡盧營不遠賊出馬隊數十匹分路拒捕前鋒甫交抬鎗連放隊中有胆怯者首先逃遁大衆驚潰勢如山倒樹屏帶親兵奮勇衝出光陞箭斃二賊練勇挑賊一人落馬賊衆驟退始得奔回生員呂諧宮陣亡廩生郭慶雲頸受三刀前任外委袁單騎奔救賊始捨之去張夢

星帶勇團丁十人抬槍二桿斷後以逼追師槍驚一人落馬始收隊返至油胡寨與大隊合回城計點練勇監犯傷亡七十三人蓋附近胡盧營諸村皆與賊通團勇奔至村中皆被捆送獻功每送一人賞錢一千五百文故死者甚多不盡歿於陣也是役也隊伍不整紀律不嚴人數太多號令不一所以致敗惜哉兵勢既挫人情愈驚守城者皆有潰勢二十三日夜大風陰晦兵刃皆出火光二十四日婁鳳閣以兵勦胡盧營與賊接仗陣殲王大忠餘匪潰散二十六日王蔭堂道憲赴任樹屏帶隊隨赴胡盧營搜拏餘匪合村從逆抗拒官兵不從賊者惟張錦張銓張鑑弟兄四家耳

七月防守紀實

咸豐十一年

自胡盧營潰散此股雖幸捕滅其餘賊勢猶張圍威縣困大名府王堂自順德府升大名道統兵解威縣之圍堂卽赴大名府搜捕逆匪收復小灘鎮勝師奉

旨赴山東征剿駐營威縣收復陷沒諸城逆匪抗拒屢被大兵擊敗七月初四日教匪程順書及其妹五姑娘統衆至曲周之安爾寨初五日到縣東之舊店東路村庄俱遭擄掠時秋稼暢茂逃民皆潛伏其中以此得免是日駐營翟固北西落堡亦有賊營附近村庄蹂躪不堪初六日掠屯庄元固諸村夜駐營彭固樹屏集衆守城時光陞以鄉試奉委赴都故未與其事候補把總蔣奉委到縣與樹屏密議曰賊營距城不遠夜劫之必驚而走樹屏以爲然簡精騎十八人與偕往沿路搜獲探信賊一名至彭固

## 肥鄉縣志

卷十五 兵紀

一一

大聲疾呼闖入村中賊大驚擾連夜拔營奔回舊店把總蔣率衆追至倉堡營不及而還賊清晨至舊店方欲喫飯而副將黃會同帶兵官陳姓劉姓跟踪追剿至在偵探突與賊遇在舊店東列陣以待五姑娘聞信整齊隊伍出村迎敵兩陣鏖戰兩時之久追殺至天齊廟賊大敗分爲二股步隊向東北逃逸五姑娘率馬隊向西南逃逸由楊家庄掠彭固出境突入成安之漳河店官兵追至城東之李家庄城上人不識也以爲賊去而復返勢欲撲城將要開炮問明是官兵始大悅樹屏預備餅饅送至彭固犒師初八日官兵追賊出境五姑娘之始至也坐繡圍車左右擁護甚衆臨敵始乘馬錦轡鞍異常華麗頭插雉尾手執鸞刀入陣甚勇號令嚴肅退縮不前輕則詬詈重則誅殺無敢違者與其兄分領兩隊不相統攝兵敗至南樂被獲伏誅

守城始末

咸豐十一年

十一月初八日接本府金太尊信山東教匪自臨清渡河至曲周令將肥鄉練勇在善樂營防堵者撤回八十名防守城池縣尹楊樹屏發人偵探緣教匪老巢在朝城縣嚴家營初三日勝帥攻破賊巢餘匪逸出四千餘人初六日自臨清州渡運河總兵成祿接戰敗績勢遂猖獗裹脅愈多至曲周縣令余承恩馳往抵禦衆寡不敵兵勇傷亡殆盡余令腿受鎗傷奔赴廣郡求救曲周遂陷此初十日探得情形也十一日黎明東北鄉難民俱逃入城中卽赴縣衙樹屏扶病而出與衆人商議軍務衆人欲閉城門濂力持不

可曰令民修城挑濠臨難不許入城此何理也且城中僅三百餘戶不足以資守禦鄉民眷屬輜重盡皆入城則各顧妻孥拚死城守矣東門最當兵衝濂親守之捕廳王守南門外委楊守北門生員張夢星王琴堂守西門鄉民扶老携幼門如歸市填街塞巷幾不能容燈後閉門與樹屏議曰人數衆多恐藏姦宄二炮後各歸寓所不準在街行走違令者斬初更派小隊出城四面巡查於城東北角獲姦細一人翻出井繩二條鐵鍊一條剗刀一把紅紬二幅濂聞之造樹屏臥榻告之曰此絕人斬關之具也號火起內外加攻吾輩無噍類矣樹屏蹶然而起曰君言是也爲之奈何濂與樹屏秘議曰城中假如火起守門者照舊守門巡城者照舊巡城不準救火以防外變婦女房中安坐不許聲張男子各執器械立於院中不準救火以防內變吾二人帥練勇救火凡有呼喊者卽姦細也如此搜拏賊無所施其計矣二更下令四街違者斬以故城守數夜城內城外數萬人皆寂不聞聲濂是以知其大可用也十二日仍守東門已刻樹屏請議事審得姦細魏祥雲欲乘黃昏混入於東城門樓北第十二塚口縋上四五人關帝廟後聚齊舉火爲號斬北門之關以納全軍因東門稽查嚴密未得入城所以被獲濂曰將伊正法東門外足以警賊人矣言未已有急告者曰東北鄉十里外烟塵四起賊卽至矣濂曰速殺之斷其內應則無事矣正法訖衆人又欲閉門濂力持不可於是將南西北三門封閉僅留東門濂堅坐城外樹屏扶病帶隊內外巡查以靖人心未刻烟焰飛騰旌旗招展邊馬交馳賊距城無三里矣衆人堅請濂入城濂諭之曰大開城門

## 肥鄉縣志

卷十五 兵紀

三

示以不測必不敢逼城難民得以盡入矣大隊至轉身卽可以進城邊馬至立即擒之耳何畏焉燈後閉門與樹屏共議城守事濂與軍功銜李占魁生員桑廉能守南城捕廳王與張夢星王琴堂守西城外委楊與吳奉先田繼志守北城前任外委袁與生員武濤武生胡翼清守東城樹屏帶大隊居中調度初更登南城東南至西北火光接數十里四街居民舖戶俱各上城令之曰邊馬至開鎗擊之大隊至再行開炮各宜靜守不許喧嘩違者軍法從事夜半西門送信曰有人自賊中逃出者來告曰賊在前屯後屯等村吃飯月落卽來攻城矣衆皆兇懼濂慰之曰此詐言也攻卽來攻耳何待月落乎且月落天將明矣爾等勿畏也十三日因賊鋒逼近東門暫閉每日啟門數次以通柴草糧餉偵探之路放難民出入以通內外消息每啟門時濂持令箭帶小隊出城以防不測令難民先入後出以免擁擠派濂子文舉趙曾棟代濂守南城四鄉難民亦按段分守午刻邊馬至北關外樹屏力疾赴北城以遏兵衝濂馳抵南城以防攻我之不備登高瞭望西北四五里外塵埃漲天大隊往西南去矣行至高爾庄白落堡二村倏正西方車馬奔馳烟塵慘淡有似打仗者濂告人曰或者援軍至乎言未已南關喊聲大起濂起視之居民獲賊馬二匹牽至城下濂令其繞道赴東城伺候開門自南門馳抵東門帶大隊啟關接入送至縣衙聞樹屏疾大作堅臥北城不肯旋署濂力勸其歇息代伊居中調度樹屏因南關獲賊馬恐生他變令出大隊防護南關濂馳抵東門送隊出城鄉民亦欲出城勢如山倒濂厲聲呵之曰放爾等入城我之力也今夜令爾

等守城爭欲出城有是理乎且賊尚未去我不忍爾等送死也衆乃止紛紛上城其乘間逸出者行不數里遇賊奔還門已閉皆宿城外焉旋署喘息未定東門馳報曰韓家庄李家庄擊姦細一人送至城下瀛因天已昏黑不敢開門令將賊繩繫而上送押班房吳家堡獲馬賊一人因路遠不敢送城令其殲斃呈獻復至縣署回覆樹屏又見東北方火光四起意欲撤隊守城樹屏依議馳抵南城調回衆勇復至東城啟關放入初更登城學書高文魁門斗高諒高人儒從曾棟守城瞿存禮同門斗吳振邦從濂四面巡查生員喬日章史肇榮執械隨之巡至西北角炮台有人告濂曰有人過城下者來告曰西北方火光官營也已獲勝仗矣東北方火光賊營也敗回舊路矣四鄉難民守城者皆歡呼曰援軍至矣有所恃而不恐矣十四日黎明雨雪樹屏疾少間欲派隊趁雪撲賊營濂力阻之曰練勇無多勢必不敵敗退奔回是引賊至城下矣衆必警擾且援兵不知真假未可冒昧進兵議未決東門馳報曰步探回援軍在城西北八里外駐營矣濂帶隊放門未出縣署東門又報曰援軍前站至矣濂冒雪登城問明原委委員二人兵八人帶隊啟門接應入城同至縣署詳加詢問是勝帥所派之兵自廣府繞路迎頭堵截者領兵官六人都統明副將黃參將劉參將趙及旗員永姓烏姓者帶馬隊三千步隊六千馳救肥鄉降將宋亦在行間昨日日落堡等村打仗分爲兩翼參將趙降將宋首先接戰賊鋒甚銳馬步齊上將二隊衝散副將黃整隊而退不與交鋒賊不敢逼少刻二將整隊復戰副將黃自後攻入萬箭齊發勢如風雨賊遂大敗殺戮千

## 肥鄉縣志

卷十五 兵紀

四

餘特來送信樹屏當下具稟回覆又欲赴官營稟見濂又力阻之議未決北門馳報曰官軍在蔡家庄與賊打仗矣樹屏赴東門彈壓濂同官營委員二人馳抵北城城上觀戰者不計其數濂令練勇將鎗炮俱各鉤火以防不測登高瞭望喬日章執鎗立於身後賊隊長五里餘分五色旗布陣密官軍分六隊馬先步後布陣疎賊先開炮馬隊驟退賊乘勢下壓步隊忽開大炮陡發烟焰飛騰連環抬鎗分隊疊進馬隊左右夾擊賊奮力衝突抵死不退鏖戰兩時許共開十二炮最後一炮聲威尤震賊陣迸散向東北逃逸如蟻之聚如水之流器械衣物拋擲滿路官軍隨後追趕前有馬上紅旗二面如潮之湧如風之馳令人神旺追至西落堡村北又復接仗鎗箭齊發僵屍蔽野賊勢不支連夜奔潰在北高村打尖匆匆而去不敢安營放火矣當將委員送回官營入夜照常防守濂仍帶喬日章史肇榮四面巡查鄉民率皆感悅濂亦喜而不寐不覺疲勞矣十五日東門洞開難民各回鄉里村民奪獲賊之馬騾軍器衣物者當堂呈交拿獲逸賊及逃兵逃勇被裹之人者與樹屏當堂審訊馬騾軍器入官衣物充賞外各按情節分別重賞被裹之人有保者准保無保者遞解逃兵逃勇解回原籍以便稽查常兒寨獲馬賊一人梁泰成冠縣人初隸黑旗黑旗解散後隸綠旗充探馬頭周兒寨獲小賊一人卜大嘴年十五歲賊首從四當家之義子也初隸黃旗黃旗殲滅復隸白旗皆在陽穀縣與官兵打仗殺人審明正法此次賊意欲駐營天台山掠成安磁州由邯鄲人山西幸遇官軍擊退不然蔓延不可收拾矣肥鄉西南三州縣不遭兵火者勝帥再

造之恩也十六日四門皆開照常集市以靖人心偵探賊信已渡河回山東矣此一役也鄉下札營者二十餘村被擾者八十餘村失去大小車數百輛馬騾數百頭衣物什器糧石不計其數柴草及一切農具皆被火焚房屋亦多有焚燬者殺死及裹去者尙未查清定數鄉下遭此大變兵力單弱不能救援雖危城幸存於事亦何濟哉幸而樹屏言聽計從一切調度機宜俱各就序而軍火器械俱全堅城深池足資保障皆樹屏先事預防之功也

#### 擊獲逆首王守清紀略

王守清邯鄲教匪董宗周羽黨也咸豐十一年四月董宗周在逍遙鋪樹旗舉事遣賊二人赴山東勾結路過肥鄉經練勇盤獲訊明正法並知會邯鄲董宗周伏誅羽黨皆散幸未蔓延王守清漏網潛逃又起邪謀倡亂其習教也認鉅鹿吳隆爲師吳隆犯罪戍黑龍江王守清遂爲教首邯鄲武安人皆信服之屢言黃龍出現是真命天子且言朱洪武轉世同治元年八月十五日邀同邯鄲人白永金周洛奔張三喇叭武安人郭文訓韓科李進興楊天青馬永善馬永言元城捕役陳六廣平人秦五常苗洛俊肥鄉人常二磨劉成於閏八月十九日作反孫國昌爲軍師李致和爲元帥馬永言爲先鋒先攻大名次攻廣府再破北京勾結至數千人且約山東延安家營餘黨東西相應尅期舉事閏八月十一日先期破案白永金等三人就擒伏法王守清武安王守清之子王恭同陳六之子陳大牛陳二牛奔回元城十四日陳六聞

## 肥鄉縣志

卷十五 兵紀

五

風逃遁密約肥鄉人田名奎劉黑馬搬取家眷村民會合民役拏住解送元城此大概情形也十二日裕豐厚商人王鶴翔暗來送信當卽知會樹屏嚴密偵探十五日樹屏赴府審案武舉李文河送陳六起反信廩生單清傑送秦五常苗洛俊常二磨起反信十六日丁道台心齋過境樹屏回署辦差濂將機事密告樹屏曰頃在府見邯鄲密稟拏獲白永金等供出王守清陳六及積善常姓尙不知何名常二磨猾賊也通逆無疑矣明日君送道台我連夜下鄉緝賊十七日道台起程樹屏黎明馳抵積善常二磨已壘門逃遁當將練長鄉地隣佑帶回看管十八日方欲提訊東鄉有人送信賊於今夜襲肥鄉蓋以肥鄉防守甚嚴東西中隔故先破肥鄉而後起事也濂與樹屏知會竹坡壽人派勇巡城守門以防不測未刻紳士郭慶雲赴學送信陳六已於十六日晚入城矣濂大驚會同壽人密告樹屏並知會張廷昭王琴堂張夢星李占魁嚴密查訪五鼓探得陳六實於十六日入城十七日聞拏常二磨信已出城矣是夜防守嚴密幸而無事十九日提訊練長常獻明常步揚等因有生監故會同濂一堂嚴審常二磨不知下落且供出王守清王恭時相往來且於三月間在村聽戲樹屏大怒責打練長且欲送大名審辦濂令勒限三日將常二磨家眷獻出退堂樹屏謂濂曰罪人不孥君令獻家眷何也濂曰常二磨之妻常步揚表妹也現住伊家但請嚴比常二磨可得也而王守清亦可跟踪矣二十一日照限提訊衆口確鑿羣推常步揚而常步揚無術以解免矣退堂後常步揚之子武生常獻璧跪求方略告之曰常二磨家眷係爾至親臉面所

關斷不肯獻但將常二磨設法誘回捆送伊妻可保無虞若能拏住王守清不但無罪且可有功不然一送大名則爾家破矣獻璧懼回村無計可施二十二日晚有人赴村訪常二磨常獻璧與之遇不識也但告以不在家其人遂行有識之者曰此王守清義子馬永善也追至西賢店會同團長劉奇及村民拏獲尙未回村王守清適至聞常二磨在逃欲遁村民追至西賢店一同就擒二十三日清晨送學濂卽見樹屏請將積善練長鄉地隣佑暫行開釋仍勒限拏常二磨再提犯嚴訊據王守清供傳教有年信從者多因思聚衆造反僭稱皇帝改元喜春以子王恭眇一目垂手過膝生有異相有天下後卽傳位於子因邯鄲武安查拏甚緊故從涉縣磁州潛赴肥鄉會同常二磨陳六於東方起事馬永善供係武安人因王守清醫母病愈認爲義父邪黨訛言黃龍出現以爲天命有歸故自武安將王守清救出謀於肥鄉起事以肥鄉有從逆之人故也二十四日樹屏解犯赴大名二十五日伏法二十六日樹屏回縣過廣平授計楊贊臣誘拏苗老俊秦五常奔館陶而積善村又將王守清之子王成馬永善之弟馬永言拏獲送案緣常獻璧回村時密諭之曰逆首雖獲羽黨未知有潛赴村打聽消息者立即擒拏不然伊等與賊結讎將來恐圖報復也獻璧受計去果然就擒據王成供係王守清次子因查拏緊急將家眷送邢台臭水村藏躲特來會同常二磨起事馬永言王守清所授之先鋒也供亦相同而楊贊臣亦將苗洛俊解至與王成馬永言相質通謀造反屬實九月初六日解赴大名伏法初九日樹屏竹坡壽人赴韓旺拿獲張五撓子張

## 肥鄉縣志

卷十五 兵紀

六

二辛酉張鐵頭張小雲崔國興張大辛酉皆陳六所邀之人接應王守清者也惟張金錡在逃是日劉家庄鄉團亦將劉成捆送到案十二日常二磨被擒蓋買通秦五常誘伊至館陶孫村也二十一日解赴大名一同正法而全案始結未幾而楊蓬嶺張錫珠五十三人倡亂幸先機破案也

戰守紀略

同治元年

十一月二十八日賊至館陶之房兒寨踞縣之東楊竹坡外委帶大隊三百人赴東漳堡防堵派紳士稽查四門三更樹屏請議事接楊竹坡信賊駐元城之千家寨廣平之寺郎固邊馬至大留踞縣東南界僅四里濂大驚曰于家寨陳六之家也明日撲肥鄉決矣樹屏意欲出隊濂力阻之曰主將宜居中調度以爲各路應援若出隊在外賊乘虛深入路遠不能回救則縣城危矣因調元固一團赴河頭堡交界堵截調西南四團赴元固以爲聲援並調各團相機策應調大隊赴西賢店以爲各團救援二十九日早晨同劉光陞商議城守濂守東門光陞守南門西北兩門把守無人先期堵閉樹屏督紳士運炮械安置四城已刻元固團總飛馬來報言四團未到賊直撲河頭堡鄉團長鎗多而火器少又兼步隊難過馬隊奔衝團長團丁傷亡甚衆村民大震紛紛遷徙入城午刻屯庄營團丁九人帶傷而至言團總武生程榮愷等被賊圍住與各團長力竭陣亡衆愈懼急欲閉門濂力持不可未刻翟固一團驚潰團丁俱奔赴城中濂不令人城飭各持器械防護吊橋難民盡數得入申刻西張寨一團赴城護救濂與樹屏按村點入燈

後閉門下令淨街飯畢同光陞見樹屏議事分路巡城賊在彭元固等村駐營火光相接距城僅五六里尚不敢逼城初更馬勇先回言大隊獲勝二更大隊凱旋濂與樹屏開門接入整齊隊伍鼓樂前導同至縣衙詳加詢問竹坡云自東漳堡起營至西賢店遇賊四五百人結陣以待連撲數次屹立不動少頃大隊約二三萬人西西北三西圍住適北高團增生王崇儒帶九十餘人趕至合爲一隊結成偃月陣賊分路夾攻相距切近抬鎗轟擊馬隊紛紛落馬步隊倒地甚多劈山炮打二百步子貫四五人當之者人馬俱斃督隊賊目中鎗身死賊始退去遠六七里徐徐收隊繞道回城練勇無一受傷者衆皆大悅咸與樹屏竹坡賀功樹屏竹坡亦免冠稽首謝我教演指麾之力亦一場快事也事畢巡城守城者聞捷勇氣百倍初一日黎明僅啓東門放難民出入以通樵汲糧餉偵探之路仍守東門刻不敢離逼近賊氛不得不靜以鎮之也辰刻田兒寨西落堡一帶火起距城僅三里衆皆恐懼濂慰之曰賊已啟行不來撲城矣登城瞭望兩邊縱火大隊中行馬步相間十餘里不絕練勇見濂求大老爺發令出隊濂告之曰賊已去遠力不能追即使追上力竭筋疲其何以戰且孤軍深入前無應援此危道也俟打探清楚出隊不遲更後舊店團總楊璋至言前署曲周余令自安爾寨追剿因兵力單弱請兵應援北高武生武士仁監生王開基舊店文生楊璋監生陳沛然領團勇四百餘人與余令合兵追至永年縣長橋集與賊接仗四面圍攻陣堅不動火藥鉛丸將盡楊璋領馬勇二人突圍而出星夜求救初二日黎明出隊馳至長橋賊已遠去

## 肥鄉縣志

卷十五 兵紀

七

余令與鄉團已撤回曲周收隊而返四鄉搜拿餘匪紛紛送城難民間有還鄉者初三日武士仁至言自曲周撤回團勇並無損失此連日戰守情形也惟村民被禍甚重在學生監充練長者死亡十餘人令人不勝慟惜耳

### 戰守紀實

十二月十七日賊至下堡寺東北鄉民紛紛逃入城中與光陞會商樹屏濂仍把守東門未刻賊至曲周之候村難民逃入者愈多燈後閉門難民後至者皆不得入三更風雪交作兒女啼號令人心惻恐黑夜姦細混入不敢開門十八日黎明難民車輛堆積城外數千輛進縣衙面見樹屏分啟南門以納外車辰刻始少爲疏通仍閉南門濂專守東門已刻賊已入縣東北境烟火四起距縣無十里午刻調四街四關鄉團分守塚口未刻楊竹坡帶大隊四百人追剿賊聞風遠遁烟火頓熄追至孟家庄獲馬賊二人遣人偵探賊已出境入永年矣因撤隊回城更後巡查四城復遣人偵探賊踪回言賊在永年之牛家堡等村駐營距城僅二十里十九日五更楊竹坡出隊追剿樹屏欲同去濂力阻之曰城內避難者數萬人不能保無姦細空城遠出變生意外悔無及矣樹屏乃止已刻探馬回言賊聞出師拔營夜起遁入邯鄲境大隊追至辛安鎮不及而還午刻大隊撤回東北鄉難民各還鄉里申刻將連日拿獲各鄉捆送之賊九人俱正法二十日賊自邯鄲返撲西南鄉大震逃入城中者愈多午刻楊竹坡領隊至天台山防堵探賊在

邯鄲之河沙鎮天晚撤隊回城更後巡查四城火光約在廿里外二更難民有逃至城下者言賊在石柱寺等村駐營距城二十五里二十一日楊竹坡至天台山防剿適余蔭軒自邯鄲追賊至在縣之西韓接仗獲勝賊敗退東竄倏遇大隊斂兵南入成安境因撤隊回城申刻伊鎮台前隊開州勇四百人至安置東關燈後余蔭軒領兵勇一千七百人至兵安置北關勇安置南關督標兵堅欲入城勢不可遏樹屏臥城門下慟哭阻之濂與光陞及蔭軒力爲排解逾時始定延蔭軒入城詳加詢問言自帶勇五百人通永興都司領步隊五百人馬隊六十人合兵追剿未及交鋒通永馬隊五十餘人棄腰牌號褂投入賊營復有二人下馬潛入蔭軒陣中欲燒火藥車蔭軒看出拿住一人一人復逃入賊隊賊勢遂橫悉力攻圍蔭軒軍開銅炮轟擊兵勇間有受傷者蔭軒與姜游擊悉力捍禦出奮勇隊幾奪其銅炮抬鎗連環迭進賊始敗退然亦危矣二十二日黎明與樹屏光陞見蔭軒商議出隊蔭軒云連日疲勞需休息一日鎮台將到伊不打仗未便合兵求其先出隊可也辰刻鎮台到接入城中樹屏稟見面求云賊在成安之杜村距城無十五里請大人剿賊本縣練勇全隊接應鎮台觀望遷延不允所請樹屏慟哭以陳鎮台不得已始允出隊午刻鎮台兵勇在城門互相扭打幾成大變適鎮台車到擁擠不得出城濂告崔游擊解勸彈壓事始得息未刻鎮台領兵起行並未剿賊迂道赴廣平孟固駐營楊竹坡領隊在後兵力單弱不敢深入耀兵境上而還燈後樹屏與蔭軒商議一同出師且贈以開山炮二桿蔭軒甚悅是日兩處兵勇數千人

## 肥鄉縣志

卷十五 兵紀

八

兵差頗難辦理鎮台行後濂與光陞大開城門放難民出入令兵勇入城買食方得安靜二十三日黎明樹屏竹坡出隊蔭軒姜游擊繼之督標通永之兵不得已始行辰刻合兵追賊至成安賊赴河南臨漳西南逸去蔭軒等駐成安樹屏竹坡領隊回縣人心少安二十四日難民漸還鄉里已刻聞賊自臨漳反撲成安游騎至荆科杜堂堡等村難民去而復返盈街塞巷幾不能容燈後樹屏遣人知會蔭軒兩路會剿五更接蔭軒回信言在成安西關外申刻與賊接仗用開山炮轟擊二鼓賊始敗走三十里駐營明日如約出師黎明樹屏竹坡出隊與蔭軒等會兵西韓賊聞兵出帥師潛遁並不放火遣人偵探賊已入邯鄲之蘇曹矣蔭軒等赴廣府樹屏竹坡回縣尚未抵城而謙侍衛伊侍衛王恩第馬步數千人至濂與光陞閉門不納遣人知會暗啟南門以納歸師關廂村庄搶掠一空二十六日兵勇未行門不敢啟辰刻謙侍衛至城下樹屏正言責其縱兵殃民聲淚俱下謙侍衛無言可答始領兵勇啓行午刻兵勇去遠城門始開難民尚未敢去也二十七日黎明啟門難民回鄉者車不下數千輛人心漸安二十八日清豐縣團練馬隊六百人至李象九押行竭力籌辦幸而無事二十九日步隊數千人至年近歲逼又兼兵火之餘與樹屏光陞竭力籌辦始肯起行而縣北村庄俱遭搶掠但不殺人放火耳此連日軍務兵差實在情形也

### 戰守紀略

同治二年正月

新正月初三日祝爽亭觀察過境接見之下相待甚優於樹屏尤加褒獎且傳令帶肥鄉練勇全隊出征勢

不能辭而不知其故退見幕友鄭子謙知觀察於去歲十二月十一日抵任訪察南三府情形於肥鄉各官政績及練勇打仗獲勝功績深爲贊賞而旗幟鮮明器械全備技藝嫻熟紀律嚴明兵勇皆不能及又采訪輿論咸以爲然三十日一鼓接督辦直東交界軍務 旨與子謙商議出師以大名勇二千餘人皆無可恃欲帶肥鄉勇隨征子謙深以爲然觀察先稟制軍而後過境調兵樹屏亦不能不顧大局矣初四日楊竹坡外委帶全隊四百餘人赴威縣隨征而添募壯丁打造槍炮又費一番經畫初九日賊有赴下堡寺信初十日賊至西河寨元兒寨難民逃入城中者車有千餘輛濂防守東門設法疏通俾無擁擠而稽查姦細較前愈嚴已刻裕豐厚王守正來送信言賊因練勇遠出暗伏姦細內外鈎結欲乘虛襲城當卽回明樹屏稽查嚴密入夜調街關團練守城濂與光陞樹屏徹夜輪流稽查以防不測十一日賊回兵平固店又入候村難民逃者愈衆而大風揚沙昏暗難辨恐姦細混入彈壓稽查刻不敢離非肥鄉人一概不準擅入有緩頰者嚴加申斥概不準行任怨任勞不得不如是也入夜與光陞樹屏照常巡警雖有姦細亦不敢妄動也十二日賊退至邱縣之陶兒寨兵氛少遠人情漸安白晝盤查黑夜巡警仍不疎懈十三日難民盡數旋里門禁少寬十四日聞制台至威縣余蔭軒授廣平府十五日已刻樹屏到學言練勇敗賊於曲周之香城固尙未知其詳未刻馬勇藍奎來報捷言自到威縣後派在第十營防堵十四日大名鎮甯都司率兵勇六七百人剿賊香城固衆寡不敵爲賊所圍自卯至酉勢甚危急姬外委突圍求

## 肥鄉縣志

卷十五 兵紀

九

救楊竹坡帶隊往援撤隊喊殺勇氣百倍槍炮未放賊馬步警曰肥鄉藍頭至矣則皆走逃遁至十里外始駐營重圍立解將甯都司及兵勇全數救出制台賞羊一隻饅首五百斤道台賞錢八十千馬勇藍奎黃文山賞六品頂戴濂與樹屏光陞大悅亦元宵一佳話也十六日聞賊南竄信鄉民又有逃至城中者十七日聞賊戰敗信逃者漸漸復還十八日聞余蔭軒於十六日夜間劫黃金隄賊警賊衆警潰十六日蔭軒會合天津大名兵勇將賊擊散河西漸就肅清盖河東逆匪大股已於初八日全數渡河河西之賊僅二千餘人連日追殺四散逃逸故捕滅較易十九日制台遣天津府同知陳小帆到縣催促搜拿餘匪樹屏勅勇七十餘人先赴舊店駐防二十日小帆行後帶隊赴舊店二十一日四鼓赴明盧營拿賊而賊首張富在廣平縣孫村潛藏連夜潛至孫村將張富及從賊拿回二十二日訪得胡盧營賊首王金聲在廣平舒兒庄居住當卽進署秘告樹屏樹屏已先有所聞因練長劉老培窩藏不好辦理二十三日樹屏訪得廣平張棟村教匪十餘人並爲劉老培事帶隊至廣平會楊贊臣往拿贊臣因賊勢甚盛兵勇單弱不敢同行樹屏不得已與之密稟道台請兵合剿二十六日肥鄉練勇敗賊於善樂營此地緊依運河賊前隊意欲西渡本村回民正在堵禦楊竹坡帶隊赶到隔河結陣紅衣賊目乘馬先到隊長史奎開烏槍轟擊打於馬下數人下馬欲埋其屍烏機炮又開打死二人餘衆奔逸少刻大隊數千人至開銅炮轟打我師連開四炮練勇無一傷者復開烏機炮轟打一炮碎其炮架並轟死點炮之人賊搖手曰肥鄉炮無

虛發不可與戰也因相卒退去不復渡河向東逸去是日道台及余蔭軒至舊店樹屏潛以師會二十七日三更出師辰刻至張棟賊欲拒捕見道府領大兵至不敢動跪接於途蔭軒令將匪人獻出僉曰有姓名否蔭軒無以應樹屏以名單逞閱皆不識其人樹屏赴村搜拿餘匪令其轉相識認單上之名無一脫者惟王功陳六王金聲先期逃走拿獲陳六之子陳大牛單上之人全數正法共十七人王金聲之祖母伊姑母咸被獲舒兒庄劉老培亦就擒蔭軒帶至大營另行審辦二十九日燈後樹屏始回縣此連日戰守情形也

兵守紀實 同治元年二月

賊自渡河後崇制台令挖濠築牆以防偷渡二月十一日制台由威縣巡河及查閱濠工甫抵小灘鎮大名道祝大名府長元城縣胡赴小灘稟見防河武弁亦排隊往接僅留十三人防守或書眠或聚賭毫無防備賊遂由岔道娘娘廟東城口分頭搶渡大名鎮姜聞信率三百人馳往抵禦雖有殺傷已無及矣制台聞驚奔還大名道大名府元城縣爲賊所隔相率逃逸候補知府金秉忠行至北河口遇賊被害賊既渡河河西賊羣起應之賊勢遂盛駐黃金堤等處十二日肥鄉聞警戒嚴東門吊橋動工僅開南門以通往來濂仍嚴密把守難民逃城中者較前愈多午後風起塵埃漲天寇警愈緊夜駐廣平之韓村寺郎固等村邊馬至韓旺席寨調街關團練守城十三日風愈大寇愈深逃難者愈衆未刻賊至東漳堡等村余

## 肥鄉縣志

卷十五 兵紀

十

蔭軒太尊趕至連戰敗之賊夜至申家營北高等村甫經飯熟聞兵至未及食而遁十四日風漸息賊入永年之大油至曲周之塔子橋大名鎮姜通永鎮徐追賊過境分駐縣東各村楊竹坡率練勇回城暫息人心漸安十五日楊竹坡仍帶隊隨征是日賊入鷄澤十六日至南和臬台王蔭堂帶肥鄉練勇剿賊賊分二股一股由唐山任縣柏鄉隆平甯晉北犯官兵盡數窮追一股由南和反撲永年十七日入臨洺關十八日入邯鄲縣西各村大震紛紛逃入城中調街關團練守城十九日入成安境邊馬至張兒庄荆科等村焚掠二十日由臨漳回撲成安之漳河店二十一日大風揚沙難民入城者勢如潮湧賊入縣南李家堡距城十五里卽赴縣署告知樹屏甫返南門則邊馬已至張達矣已刻邊馬至常家庄北距南關不遠難民勢如山倒衆人驚擾爭欲閉門濂與光陞力持不可樹屏聞信馳抵南門令出隊南關外賊騎退去樹屏暫回未刻邊馬至常家庄城南堡焚搶距南關甚近難民勢如山倒衆人又欲閉門濂與光陞力持不可樹屏聞信就率練勇百餘人列陣南門外村民持械從者二千餘人南關鄉民出隊追赶城南堡鄉民亦與接仗火鎗擊傷二人賊始敗遁酉刻照常閉門微雨一陳風亦漸息初更巡城西南火光相接廿餘里賊氛逼近與光陞曾標徹夜巡警二十二日與樹屏帶隊啓門難民擁擠甚多正在設法疏通邊馬已至南關外矣濂與樹屏固守南門令難民分避牛馬牆內以防賊撲令練勇西濠外背城結陣光陞壽人曾標登西城率諸紳士分頭抵禦大隊在馬固村東距城四里許邊馬數十人分路撲城南關首先

接戰抬鎗擊賊墜馬復上復開鎗中其馬須臾人馬俱斃賊撲西關光陞揮衆馳救西城開鎗助之擊斃一人賊始奔潰賊撲北關鄉民執械堵禦北門開鎗助之始敗退大隊不敢逼城由馬固繞勒馬台村西東北逸去會標赴南門馳報濂恐北面吃重留曾標幫同樹屏守南門由東城馳抵北城守禦空虛處妥爲安置登北門瞭望前隊馬步約千餘人馬少步多皆白旗中隊約三四百人皆馬隊紅旗白旗後隊三四百人皆馬隊白旗由蔡家庄村北向東北而去人情漸安夜賊在柴家庄崔家庄魏村南營北營等村駐營火光相接十餘里然距城二十餘里矣二十三日賊出境入曲周之塔子橋余蔭軒太尊回兵遇賊接仗賊敗退奔還復在百戶寨南營北營等村駐營又有賊五六百人皆馬隊黑旗由廣平之平固店掠北高等村與之合二十四日賊復反撲西南辰刻邊馬至勒馬台光陞固守南濂馳抵西城調度行至西北炮台望賊大隊由高兒庄白落堡等村向西南而去距城十餘里炮力不及仍返南門已刻樹屏又募勇百餘人在南關外操演陣法施放火炮以壯聲威邊馬在四五里外時常出沒午刻杜齊等村難民帶傷踉蹌奔至人情愈驚未刻樹屏帶隊在南關外列陣以靖人心賊亦在高兒庄列陣但不敢來撲耳酉刻撤隊回城微雨一陣照常閉門更後冒雨巡城西面火光相接二十餘里南至天台北至龍堂堡距城僅七八里半夜雨愈大濂恐守城者疎懈四更後同喬日章冒雨巡城到處撫慰以激勵人心西面火光愈熾回署已五更矣是夜東面亦有火光約在三十里則有賊一支至舖上辛寨大寨駐營已入縣東南

## 肥鄉縣志

卷十五 兵紀

十一

界矣二十五日照常啓門賊鋒逼近一概車輛不準入城恐賊猝至有碍出隊也微雨濛濛賊未啓行未刻同光陞守南門有人馳報曰東面有馬數匹至不知是兵是賊濂與壽人馳抵奎星樓見騎絡繹不絕大驚曰是昨夜入縣東界之賊也當卽調團練守城壽人駐東濂馳抵東北角炮台集衆固守賊由李家庄村東西北行繞西落堡村後西行馬步相間約數千人邊馬至西落堡村前裏脅逃人我揚聲開炮逃人四散賊亦奔還繞城五六里行走壽人欲開炮濂力持不可曰炮力不及倘擊之不中是引賊至城下矣忽聞西南角開炮則賊列陣城西四里外沙灘遣邊馬數人撲城蓋知東北緊急欲乘虛深入也樹屏固守南門列陣濂墻令難民避入牆內曾標固守西南角炮台光陞往來策應先開鳥機炮次開大炮共開七炮擊斃四五人賊始退去姜鎮台追賊至康家堡賊撤隊回禦適僧王營恒都統帶馬隊二千至賊以爲東路賊至也方加詢問恒都統揮衆奮擊姜鎮台左右夾擊大敗賊衆殲斃數百人奪馬二百餘匹車數千輛牛驢無數賊南入成安境官兵駐營天台山城中不知也但聞西面鎗炮響耳酉刻大雨風雹一陣與樹屏光陞照常閉門濂蔽雨南城樓聞賊至北關外由東城馳抵北城雨漸止集人守城比至北城登高瞭望北面火光相接十餘里賊在前屯後屯普爾寨常爾寨等村距城僅七八里尤爲吃重而西面火光少遠西南火光猶熾然距城遠矣東面亦有火光濂危坐北門彈壓激勸以固人心三更始旋署二十六日天漸晴氣漸暖恒都統姜鎮台敗賊縣西南之焦家營賊東逸又敗之於廣平此先來一股被

官兵擊散矣已刻余蔭軒太尊追賊至縣西境後來一股起營西行猝與之遇倉卒南奔蔭軒統兵駐東關濂先在南關接見復與樹屏光陞在東關稟見仍守門又聞舊店倉堡營等村告海都統劉參將統兵追賊過境未刻楊竹坡帶練勇回城徐鎮台由荆科杜堂堡等村拒賊西竄申刻余蔭軒赴成安霧觀寺追賊行至韓家堡與賊遇東南西三面火光四起不敢撤隊連夜調肥鄉練勇接應是夜官兵雲集練勇回城人情大安二十七日五更樹屏竹坡帶新舊練勇六百餘人盡數出師與蔭軒合兵追賊至成安之河疇與賊接仗蔭軒列陣西樹屏列陣少東徐鎮台合宋景詩王恩第之兵由南兜剿蔭軒首先接仗開炮轟擊賊向東逃逸樹屏竹坡揮衆衝突開鳥機炮一炮打死四人賊大敗向東北逃去已刻敗賊過西屯庄距城僅六七里濂集難民萬餘人各執刀矛分頭抵禦始由彭固八里庄楊家庄等村向東北逃逸樹屏竹坡收隊回城是夜賊馬隊駐廣平之平固店步隊駐瓜精庄薛家庄二更即起行余蔭軒駐營北高村徐鎮台駐屯庄營二十八日官兵俱追賊出境難民亦各還鄉里此後來一股被兵擊散矣此一役也四境擾遍各村傷人甚多房屋器具皆被火焚受禍之慘未有甚於此者也守城之險未有甚於此者也

防守紀實 同治二年三月

三月初六日辰刻新任韓介孫接印已刻賊由永年入縣北境難民入城者紛紛未刻介孫知曾濂與光

## 肥鄉縣志

卷十五 兵紀

十二

陞照舊辦事仍守南門少刻介孫至濂告之以求楊樹屏幫辦一切介孫深以爲然樹屏慨然應允與竹坡商議明日出隊中刻賊大隊至黃兒寨邊馬至蔡家庄濂由南城馳抵北城調街團練防守濂守東北角炮台以遏兵衝賊由西落堡村後赴翟固向東南而去塵土中馬步絡繹不絕黃昏時北路前屯後屯常爾寨一帶火起距城七八里燈後東路倉堡營田爾寨屯庄營一帶火起距城十餘里濂巡查四城二更至公館告知介孫並將地方應辦事宜詳細敷陳復至縣署見樹屏商議出隊事旋署已四更矣初七日黎明同介孫送樹屏竹坡出隊辰刻突有馬二十餘匹至南關飭曾標登城查辦調街團練防守城親至公館請介孫到門彈壓少刻來報馬向北而去飭練勇往查追至東關外則恒都統馬隊前站也已刻恒都統兵至東關姜鎮台兵至北關城北村庄咸被搶掠午刻樹屏竹坡收隊回言追賊至屯庄營甫經撤隊望旗先遁極力窮追獲馬賊七人至東漳堡盡境而環未刻恒都統姜鎮台起行西刻賈都統兵至北關城北村庄復被騷擾入夜巡查火光不見賊已入廣平境矣初八日辰刻賊由廣平回撲至南屯庄彭固等村急至公館告介孫求樹屏出隊復至縣署催促已刻樹屏竹坡出隊介孫同去行至八里庄偵探者詭言無賊因操演陣法而還賊在謝村者聞鎗炮聲以爲兵至也向東北逃逸至屯庄營與官兵遇方接仗時姜鎮台自西追至賈都統自北追至三路夾攻賊遂大敗又敗之於南河馬又敗之小寨又敗之清漳賊與官兵俱出境蓋劉蔭渠制軍於初六日接印初七日親自領隊剿賊故諸將用命也初十

日樹屏聞調赴軍營信將練勇移交介孫十一日介孫因無經費將練勇裁撤僅留四十二名西刻賊復由永年入縣北境入夜集街關團練防守登城瞭望火光尙遠詳問逃人已在南營北營百戶寨札營矣十二日清晨啓門逃車甚多設法疏通踰時始定已刻賊由舊店倉堡營南北屯庄彭固元固入廣平境馬隊約千餘人十三日賊馬隊百餘人入縣境東賢店打尖復入廣平境官兵追賊亦過縣東境惜練勇裁撤無以禦之耳十五日樹屏輕騎簡從赴軍營行至永年之大油遇賊而還十六日樹屏帶隊赴軍營是夜就寢矣忽聞署外人聲鼎沸大驚披衣起視則楊竹坡拿賭聚賭人四散奔逃有四人踰牆跳至光陞署中下人練勇俱未就寢立即拿獲二人正在究問介孫遣人來告邊馬至前後屯矣濂大驚急將犯人交八班頭看押帶練勇登城防守詳問逃人言賊晝伏夜行並不放火出人不意以便搶掠裏脅賊營在焦兒寨等村十七日賊由縣北西入永年邯鄲境十八日聞賊一支至廣平之平固店十九日賊由東而西入縣北境調街關團練防守濂由南城繞東城至北城抵西北炮台賊由郭家堡常爾寨等村西逸塵土中馬步甚多復由西城繞至南城與介孫光陞商議軍務仍登北城防守未刻雨至始旋署申刻飯畢冒雨守門更後冒雨巡城西北賈北堡孟家庄等村火光相接距城十餘里三更西城外有人隔城拋石至城內者急會同諸紳士大索賊驚遁二十日賊由辛安鎮等村入邯鄲境是日官兵追賊過縣北境劉蔭渠制軍至廣平府二十一日官兵大敗賊於永年之劉營殺戮二千人奪獲馬騾數百匹賊分爲兩

## 肥鄉縣志

卷十五 兵紀

十二

一股北竄沙河劉蔭渠制軍帶隊親追樹屏隨往一股由邯鄲向東南逃逸二十二日賊由縣西境至相公庄康家堡等村遣馬勇三人往探獲馬一匹未刻賊由焦家營潘村西屯庄等村東去距城七八里急調街關團練防守登城瞭望前後兩隊約千餘人塵土中其行甚速步勇九人往探獲馬一匹衣物十餘件夜賊在東漳堡路家庄駐營火光距城三十餘里二十三日卯刻僧王營侍衛謙禧追賊過縣東關所奪騾馬賣與肥鄉者二百餘匹已刻劉參將追賊過縣南關馬步千餘人軍行甚速並無停留未刻謙侍衛兵起行夜宿舊店等村二十四日聞劉蔭渠制軍敗賊於沙河賊東奔曲周至香城固兩股合兵由尖塚渡河東去河西漸就肅清肥鄉解嚴難民漸還鄉里二十五日兵亂爲之一寬濂亦釋重負矣

防守紀實

同治二年八月

宋景詩堂邑人鹽梟也咸豐十一年二月與山東教匪土匪同時造反七月赴勝帥軍營投降屢立戰功擢升至參將同治元年正月勝帥赴河南剿捕捻匪帶之渡河後因兵敗不敢歸營經豫撫叅革嚴拿治罪勝帥復招之降代爲陳奏帶罪立功復從勝帥赴陝西剿辦回匪十月勝帥被遞景詩擁衆由山西直隸逃歸山東時山東降衆張錫珠等五十三人倡亂遍擾直隸交界州縣直督崇東撫譚未暇討也聊羈縻之耳景詩窺破其意佯言隨征實不爲之用也三月劉蔭渠制軍接印連破賊兵楊蓬嶺程順書等乞降張玉懷姚太來等伏法降衆悉平欲移軍討之王蔭堂臬使力主撫議而景詩因叅將王恩第正法不

敢來營連築三寨屯糧衆且殺柳林團團長反形已露劉制軍據實奏聞奉

旨不準招降催促進兵時已担延兩月矣六月初四日制軍由威縣移營館陶初八日分八隊進攻逆寨時大雨之後天氣炎熱道途泥濘難行高粱一望無際吳參將領前隊中賊埋伏全軍敗潰楊樹屏以肥鄉隊接應甫經撤隊敗軍冲入隊中遂至敗績傷亡甚多哨官耿順夏升死之餘三路亦相繼敗潰惟余太守姜鎮台崔協台三隊轉敗爲勝軍勢遂挫恒提督自臨清進兵中賊埋伏全軍大敗死傷尤多益侍衛陣亡軍勢益挫七月制軍移節臨清二十一日下令滾營而進作步步進逼之勢賊出隊滋擾屢與相持二十八日肥鄉隊擊敗賊兵軍威少振八月初三日僧王統兵自東昌來援駐營魏家窪初五日會合柳林團大敗賊兵初十日攻破逆寨宋景詩中傷逃遁僧王下令窮追十四日敗之於莘縣十七日恒提督敗之於開州賊由滑縣濬縣臨漳偷衛河漳河十八日至成安之陽高村村民奔入城中集市驚散肥鄉西街賣弓絃者逃回濂黃昏聞警卽同光陞面見韓介孫商議城守時練勇久經裁撤立飭八班頭募人復至練局檢發器械火藥二更西南鄉逃人至言賊已由荆科杜堂堡過西韓矣濂卽登城巡查西南火光不見而逃車自西南來者徹夜不斷介孫僅募一十六人實在不敷守禦又催募三十餘人十九日分啟南東兩門以納逃車光陞守東門濂守南門逃車甚多設法疏通踰時始定詳問逃人賊在相公庄唐家疇劉家庄駐營宋逆駐邯鄲之李林堡不殺人不放火向村民索飯而搶馬甚多五鼓起營由辛安

## 肥鄉縣志

卷十五 兵紀

十四

鎮入永年之沿村沿滏陽河至府南橋府東橋截住逃車甚多婦女輜重悉被劫去得馬愈多勢遂不可遏矣未刻余蔭軒楊樹屏領兵追至與介孫光陞接至東關言十三日砍伐高粱攻至逆寨賊遁久矣制軍由館陶冠縣至龍王廟渡河十八日抵大名下令由臨漳截剿我二人欲由肥鄉赴廣平府制軍不得已許之行至魏縣始知賊在成安至肥鄉知賊入永年矣蔭軒一軍凡千三百餘人陳副將一軍凡五百人張縣令一軍凡百餘人分駐東關北關樹屏因人稠地仄帶隊赴常爾寨駐營軍務匆忙未暇細述也二十日催介孫添募一百二十人仍分五隊分駐四門及縣衙以壯聲勢姜鎮台崔協台統兵過縣東境二十一日恒提台蘇都統統兵過縣西境鄉民大擾遷徙愈多二十二日制軍由廣平赴曲周過舊店介孫往接濂與光陞守城人情漸安逃車漸還鄉里蓋大秋未畢故也

防守紀實

同治元年九月

賊入永年復由鷄澤平鄉抵鉅鹿鄉團拒之西至隆平復東北入新河過冀州陷武邑劫去天津餉銀二萬兩二十五日至阜城由東光吳橋分路渡運河回山東二十八日撲柳林團猝不及防頗有損失僧王自柳官庄出隊賊始敗走適恒提督蘇都統馬隊追至僧王責其追剿不力以馬乏爲詞僧王嚴加申飭另換健馬添新兵復飭祝爽亭觀察督隊連夜追至觀城大敗賊兵奪獲馬騾一千四百餘匹他物無算復由觀城追至開州滑縣一百八十餘里接仗四五次每戰皆勝賊由濬縣石橋渡衛河抵漳河草橋彰

德府兵三百人守橋賊至逃逸賊渡河焚橋官兵至阻水不得渡比及橋成賊已遠去矣先是介孫因鋒鎬少遠練勇裁撤每門留四人濂與光陞亦不守門初五日有大車兩輛自南而北馳過東門外言賊將至矣尚不關門乎濂聞信急赴東門察訪衆皆不信濂飭紳士守門由東城馳抵南城見西南逃車絡繹不絕急下城詢問皆成安縣人言賊已過漳河店百子營至大堤西村距縣南境不遠即傳令閉西北兩門濂守南門光陞與楊竹坡守東門時竹坡新自軍營回也午刻逃車愈多言賊馬隊不足千人前打紅旗旗中張紅傘由焦家營入境復由宜官堡繞至天台山西揚聲曰官兵過此甚勿開槍村民不知真偽未敢妄動賊至沙河套奪馬截車殺康家堡鄭家堡十餘人始知其賊也寨上開炮救援賊始由康家堡辛安鎮東北去步隊甚多四圍皆馬由荆科杜堂堡入境復由西韓辛安鎮西北去則前來時舊路也夜駐營潘家寨及永年之清涼寺牛家堡等村邊馬至龍堂堡距縣僅七里而介孫僅添勇二十人除守縣衙分撥四門連前勇每門七人實在難以守禦燈後閉門面見介孫調四街團練守城濂與光陞連夜募勇六名帶之巡查四街囑令小心火燭登城瞭望賊雖不放火而火光自西而北而東或遠或近濂與光陞竹坡及張廷昭張夢星李占奎分頭巡查鷄三唱始就寢初六日仍啟東門南門詳問逃人言賊五更起營北去復有官兵馬隊數千追趕甚緊即遣練勇哨探則僧王馬隊也恒提督蘇都統祝觀察由漳河搭橋北追昨夜宿成安之河瞳距賊無二十里故五更即起行也賊聞官兵至分爲二股一股回竄邯鄲

## 肥鄉縣志

卷十五 兵紀

十五

之蘇曹官兵追至自柳庄橋接仗追殺至黃梁夢祠殺戮三四百人餘賊東北遁去其西南分竄者初七日官兵追至邯鄲之崔集村民正演習練勇聞賊已敗持械出迎官兵自後蹙之殺戮殆盡一股由永年之曲陌沿庄夜駐塔子橋尚不知消息初八日余蔭軒楊樹屏回兵救援廣屬各縣行至威縣聞賊隊過廣宗折回鉅鹿向北追去人情漸安初九日聞有馬賊百餘人由廣平之寺郎固東南逸去初十日聞有馬賊百餘人由曲周之馬灘橋向東北逃去皆塔子橋分竄之賊也十二日霜降冷風驟起介孫竹坡行祭旗禮操演練勇壯丁濂獨守東門有人牽馬驟四頭至曰賊來矣急問之則辛寨人言賊已至曲周之賈爾庄距本村僅四里矣語畢匆匆進城而東北逃車風馳而來絡繹不絕少刻北路逃車亦來光陞聞信急出城查問公請介縣竹坡罷操守城詳問逃人言自鷄澤之小寨撲曲周之四門寨賈爾庄由辛寨入境復由馬爾寨羅布營路家庄駐東漳堡邊馬至舊店則馬灘橋逸匪折回也夜調四街團練守城二更與介孫登東門瞭望火光數點若有若無約在三十里外而撤夜巡警不敢疎虞十三日清晨大霧逃車甚多啟門放入辰刻武舉袁九能至言道台兵勇駐扎廣平昨夜二更往東漳堡劫營殺十餘人奪馬七八十匹餘賊四散奔逃成安之小地村有逃賊五六十人與村民銀兩馬匹求其掩藏彼村人少不敢擒拿彭固相距甚近以地非縣屬不敢自尊官如進兵情願率鄉民策應竹坡聞信面見介孫立即招募五十餘人帶之前往濂與光陞亦飭守門練勇隨後接應行不數里遇沙窩村人言小地村之賊本村約

同屯庄人擒拿數人奪馬數匹已送成安矣餘匪乘霧向東北逃逸路過本村截拿二人特來送縣餘匪遠去追之不及矣竹坡收隊回而東漳堡亦捆送七人濂與光陞力勸介孫重賞村民提犯嚴加審訊六人曾從宋逆焚殺情罪重大卽行正法三人係裹去者審清再爲核辦人心大快申刻武生韓煜謨至言三股竄匪聚積一處約三四百人猝不及避大被其傷而劫營後官兵肆行擄掠衣物牲畜一空較賊受害尤酷也賊向東南逃去官兵並不窮追復折而東北已過安爾寨矣十四日聞陳參將湯參將在曲周之河頭收降馬賊二百餘人則東漳堡敗匪也審明藩憲王欲坑之機事不秘悉數逃去可惜也邯鄲擊散北逸之賊由晉州渡滹沱河欲東撲冀州官兵截回復由深州安平博野初十日至清風店劉制軍自冀州星夜救援由清苑之張登至滿城之訪舜橋堵截賊西撲倒馬關復由唐縣曲陽折回新樂由藁城滹沱河復由任縣南和十五日至邱縣僅存二百餘人受傷者甚多形甚狼狽十六日奔館陶十七日清晨渡運河是晚蘇恒二軍追賊亦過河其曲周旣降復逃之賊西竄至隆平適石藩司調余蔭軒救援省城提兵北行與之遇賊復乞降蔭軒誅頭目岳景春餘俱收降蓋九月初九日奉

上諭所誅惟宋逆一人餘匪能殺賊立功准其投首也二十一日有馬賊五六十人復渡河而西蓋山東擊敗逃匪也至曲周唐參將收降解赴威縣聽制台處置二十四日僧王由柳官庄赴大名二十六日劉制台王藩台由威縣赴大名並將降衆五十餘人帶至大名同僧王訊明將頭目朱登峰等盡皆正法是

## 肥鄉縣志

卷十五 兵紀

十六

夜余太尊誅降衆於曲周凡一百六十餘人於是從逆匪徒殲除淨盡矣二十八日起摺報肅清二十九日僧王帶得勝之兵赴河南二十九日制台由大名赴成安磁州邯鄲永年曲周巡邊復回威縣辦善後事宜十月初一日藩台由大名回威縣清晨至肥鄉囑州縣搜捕逃匪以靖餘孽惟宋景詩於九月初三日偷渡黃河投苗需霖幸逃法網耳

### 孫匪紀略

孫玉奎者成安縣北魚口村人也幼年家道小康有祖遺田地五頃餘不事家人生產流爲盜賊民國七年五月間該匪結夥二十二人聚於成安縣北張村東首廟內成安警兵正在圍擊適大名鎮守使王懷慶赴邢臺道經此地令護兵圍其廟發火焚之廟內埋有清咸同間火藥一缸匪正持鎗還擊間火藥暴發二十人化爲灰燼當時孫匪在寨濠洗身聞風而遁民國八年乃結夥多人搶掠永曲肥廣等縣大爲鄉民害警兵單弱未能撲滅經直隸曹督軍派十五師師長彭壽莘爲冀南剿匪總司令始將此股剿滅

### 會變紀略

民國十五年褚玉璞署直隸省督辦徵車募馬迫令各縣雇覓兵丁徭役繁興無可諱言肥鄉藁爾一邑勒派公債至大洋二十一萬圓之多差役之催促警兵之追呼幾於無村無之又兼歷年以來天道荒旱

土匪充斥民不聊生大有敢怒而不敢言之勢不然誰肯以鎗林礮火爲嘗試之具哉於時有山東歷城縣人劉某以黃沙會惑衆人民初爲禦匪計多從學習又有義和團天門會拖刀會等等到處煽惑冀南一帶所在多有遂演成十六年之亂初猶以抗欸爲名繼則成安縣迫收保衛團鎗械殺死大隊長林常勝開放監獄廣平縣殺死縣議會議長趙棟曲周縣鈔沒在縣辦公各紳家產我肥鄉亦被波及竟於四月某日突入縣城圍攻警察所迫繳鎗械土匪知縣城無備遂於次日夜分越城而入將獄內監犯盡數劫出開放東門而去當時大名鎮守使謝玉田以剿辦不力被撤繼任者爲孫魁元正欲痛剿適值黨軍北伐不暇剿亦不敢剿恐結怨於民萬一退却必遭截擊又恐爲黨軍所利用地方所以不致糜爛者此其一大原因真不幸中之一大幸也

#### 會匪焚掠東北庄紀略

按義和團卽大刀會一曰紅門黃沙會一曰黃門天門會則曰天門紅黃門多平民天門多土匪縣屬東北庄村呂鵬揚與蔡合係天門會中人因借用警局鎗械民國十七年六月縣政府飭呂鵬揚及蔡合繳鎗蔡不肯繳呂鵬揚恐受累向蔡匪逼索急遂起衝突適縣政府偵知蔡家窩藏匪徒當在蔡家剿出土匪六名蔡遂遁入臨漳成安縣邀集趙寶泰杜景李同祿竿匪約三百名於七月六日陡來東北庄城南堡村殺人放火揚言入城劫獄救其夥匪哨聚該村八日分向鄰近村莊逼索銀洋有與抗者輒被燒殺

## 肥鄉縣志

卷十五 兵紀

十七

計被焚掠村莊如常家莊趙家莊張達彭固等六七村十四日赴永年南大堡村十九日回歸住韓家堡將該村搶掠一空是役也當十四日前火光逼近城治驚耗四起警局令城內居民舖戶晝則上城防守夜則各備燈籠列槩幾滿防守八九日不敢少懈亦浩劫也

#### 張耳庄匪患紀略

民國十七年八月九日黎明時分有大股土匪一千五六百名匪首爲高連杜景趙寶泰李同祿蔡合等先佔據劉家寨任家堡是日午後二時許有匪衆四五十名向張辛庄突進經張辛庄張耳庄協同猛力迎擊斃匪數名復折回劉家寨三時許匪衆盡擄劉家寨人口財物集中任家堡時向張耳庄射擊張耳庄此時除老弱婦女不堪任戰外餘皆上寨守禦以此時之情形觀之匪衆不知張耳庄虛實似不敢犯後經張耳庄匪人數次勾引並將虛實情形詳報匪首乃于八月十日午前十時率衆取包圍形勢大舉來攻將張耳庄張辛庄包圍水洩不通張辛庄以勢力懸殊且無險要可守全村民衆盡遭匪擒獨栗信以鎗法準確膽略過人且戰且走擊斃土匪二十餘名退入寨內此時匪衆乘戰勝張辛庄之餘威全力猛攻張耳庄寨並運木梯數十架每梯以百餘枝盒子鎗掩護沿寨牆猛攻且勒令張辛庄民衆搬運柴草引火之物焚燒寨門此時張耳庄民衆處鎗林彈雨之下以棍棒短刃及少數鎗枝相搏戰血肉橫飛毫無懼怯並將土匪梯子盡用柴草燒燬寨門亦用水撲滅

當將土匪擊斃百餘名張耳庄民衆亦死傷六七名下午四時許土匪攻勢乃懈而張耳庄彈藥亦消耗殆盡七時許匪衆復來反攻又經張耳庄猛力擊退終以衆寡不敵彈盡援絕至十一日黎明遂爲匪攻破致百餘名之父老子弟爲土匪鎗決死斷頭死火焚死剖腹死斷其四肢死割其耳目口鼻死種種慘狀筆難盡述焚燒房屋千餘間牲口財物搶掠一空男女老幼擄去百餘人是日十二時許糾合任家堡劉家寨所擄人口財物滿載南去噫負治安之責者正當督隊痛剿爲張耳庄聲援何竟置若罔聞致構成此次之大慘案清夜自思能無愧乎

#### 中李堡匪患紀略

縣西南中李堡村距城十二里南界成安爲成往來要道民國十四年十月二十六日五更時分突有巨匪高連等百餘人陡入村中外設巡邏禁人出入焚燒房屋橫行搜掠財物一空無一家幸免者惟武姓家稍違其意竟爲所斃獨該村東北隅劉姓爲防匪計建一樓高五丈餘名爲得一左右鄰避於斯居高臨下得免其患盤居一日該匪未敢近樓附近民房亦未遭焚午後三時齊越林率隊往擊鎗聲盈耳猛力進攻土匪向西逃去六時縣長進村查看被匪斃死武姓男女二人擄去男婦十一名焚燒房屋五十餘間牲口三十頭衣服財物無算該村被害之大略也

## 肥鄉縣志

卷十五 兵紀

十八